

Relaciona cu bahamento di gasto di Gobierno, drs. Marisol Tromp ta opina:

ENVEZ DI TA SOLIDARIO Y INVERTI DEN NOS HENDENAN, GABINETE EMAN A LAGA NAN CAI

ORANJESTAD (AAN): Segun drs. Marisol Tromp, den e siman cu a pasa, pueblo por a haña otro prueba cu Gabinete Eman no sa kiko ta solidarismo pa cu prohimo. Pueblo a spera un Gobierno cu ta inverti den e ser humano y ta solidario cu pueblo. Ora cu bo yega asina lew di usa como argumento cu pa onderstand gobierno ta paga 1 milyon florin ariba presupuesto y cu pesey mester bin herkeuring pa esnan gehandicapt pa asina por baha gasto, esaki ta un muestra total di un gobernacion cu no ta pone e hende central. Si tin problema financiero, pakiko Gobierno no ta corta riba e postnan cu ta gasta mas placa? Tur hende sa cual ta e promernan cu mester wordu corta, cualnan ta e.o.:

- 30 milyon pa aña na coordinadornan
- 20 milyon pa aña na consultantan, y ruman di 240 florin pa ora
- 25 milyon pa aña na huurmento di edificio, di cual tin varios cu ta bashi

Gobierno no tin curashi di corta gasto riba e miyonnan cu e ta malgastando di pueblo su placa di belasting pa 6 aña caba, pero si tin e curashi di corta riba esnan cu abo como gobierno tin e obligacion di yuda, cual ta esnan menos afortunada. Esaki ta muestra di cu gobierno a perde nocion de realidad.

Partido AVP a lubida riba solidarismo pa cu prohimo: Como un partido social democrata, MEP tin e filosofia cu nos ta para pa libertad, solidarismo y justicia social. Den un congreso recientemente nos a bira masha contento ora a mira e lider nobo di partido AVP tambe papia di solidarismo, pero awor nos ta compronde cu e solidarismo di AVP ta pa esnan poderoso. Pues un solidarismo neoliberal di ta solidario incondicionalmente cu poderosonan, pa asina saca probecho politico y e pueblo humilde AVP ta castiga nan bao di e capa di palabranan bunita y manipulacion. Si sigui Ministro di Finanzas su propaganda politico den medionan di comunicacion, e ta bisa e.o. cu aña pasa Gobierno a inverti 60 milyon. Awor e tin cu splica pueblo dicon gobierno no kier inverti



den esnan di menos recurso, cual ta **un obligacion di gobierno**. Atrobe nos ta mira e falta di vision total di partido AVP, ya cu e no ta comprende kiko ta **rol di gobierno**. Partido AVP ta muestra di ta carece di capacidad pa comprende e procesonan social den nos comunidad Arubano. Pa e gobierno AVP/OLA ser social ta nifica solamente "duna e ser humano placa".

Dicon algun tempo pasa a gaba cu a hisa bijstand di esnan gehandicapt, y e ora ei gobierno no a bisa cu e ta un "peso riba presupuesto"?

Recomendacionnan: Loke ta resalta ta cu gobierno no tin dominio pa loke ta trata maneho social-laboral. Cualquier gobierno cu conocimiento di materia social lo a bini cu un maneho cu tin como meta principal e in-

greso den sector laboral di esnan cu ta haña bijstand, pa asina e.o. minimalisa admision di trahadornan migrante. Un gobierno sabi lo no a inverti den sponsornan di campaña por medio di race-track of vierbaansweg, pero den nos hendenan. Envez cu gobierno pensa solamente den baha gasto riba tereno social, e por a inverti den guia y creacion di condicionnan pa por ingresa personanan gehandicapt cu ta desea di traha den sector laboral y traha tambe riba nan aceptacion. Un gobierno sabi lo a yama doñonan di trabao promer pa splica nan cu gobierno kier nan cooperacion pa reingreso di esnan di menos recurso den sector laboral. Nan por a traha

hunto pa yega na un plan cuanto nan ta dispuesto pa inverti den esaki pa tuma nan na trabao. Pasobra tur hende sa cu pa por ehempel tuma un persona cu cierto handicap na trabao, bo mester por duna cierto condicionnan manera p.e. espacio, cierto aparatonan y tambe concientiza empleadonan den aceptacion di e personanan aki.

Pa finaliza mi ta muestra un vez mas cu e lider nobo di partido AVP a faya y no sa con pa traduci solidarismo den un maneho social. Nos pueblo ta testigo cu Aruba mester di un gobierno social democrata cu por balansa tur interes, y no un gobierno cu e balansa ta pisa solamente pa banda di un "grupito".

TELEFONNAN DI DIARIO

826747- FAX 828551

THE FLYING WAVE!!

